



Annuar.

Jangan ada komuniti ketinggalan dalam pendigitalan negara

Oleh NUR SHARIEZA ISMAIL 28 September 2021, 4:02 pm

PUTRAJAYA – Kementerian Komunikasi dan Multimedia Malaysia (KKMM) akan bekerjasama dengan semua pemegang taruh di dalam industri untuk memastikan tiada komuniti yang ketinggalan dalam pendigitalan negara di bawah Rancangan Malaysia Ke-12 (RMK-12).

Menteri Komunikasi dan Multimedia, Tan Sri Annuar Musa berkata, akses kepada internet sebagai hak asasi manusia akan menjadi pemacu utama bagi kementerian.

“Sehubungan itu, KKMM komited di bawah RMK-12 untuk memberi tumpuan bagi mempertingkatkan ketersambungan digital dan memperhebat ekonomi digital serta memberi nilai tambah dan manfaat kepada Keluarga Malaysia.

“Saya juga telah berjumpa dengan pelbagai pemegang taruh di dalam industri telekomunikasi termasuk daripada pihak swasta untuk memastikan inisiatif pendigitalan di bawah RMK-12 menggunakan satu pendekatan keseluruhan negara,” katanya menerusi satu kenyataan di sini hari ini.

Menurutnya, KKMM mengetuai Kluster Infrastruktur Digital dan Data iaitu salah satu daripada enam kluster yang dibentuk di bawah Rangka Tindakan Ekonomi Digital Malaysia (MyDIGITAL) dan Dasar 4IR Negara bagi mempercepatkan ekosistem pembangunan ekonomi digital dan 4IR negara.

“Oleh demikian, kementerian akan sentiasa memantau dan memastikan pelaksanaan inisiatif pendigitalan yang dinyatakan di bawah Kluster Infrastruktur Digital dan Data ini dilaksanakan mengikut fasa yang ditetapkan sehingga 2025 atau dipercepatkan lagi daripada sasaran ditetapkan.

“Serta bekerjasama dengan pelbagai pihak berkaitan kerana inisiatif-inisiatif pendigitalan merentas kementerian dan agensi lain,” katanya. – K! ONLINE